



秋澗先生大全文集卷第六十七

翰林遺藁

增謚睿宗仁聖景襄皇帝玉冊文



臣再拜稽首言伏以

至德難名於穆乾坤之大孝思罔極有嚴

祖考之稱稽遺美而載揚廼守文之先務弘宣

令問茂對

耿光伏惟

睿宗景襄皇帝秀拔神支淵潛龍德

英武內根於仁孝

溫文外表乎謙恭

先事而謀

臨機善斷當軍國

撫監之際赫風雲

無伐之功川蜀

威加宋人爲之褫氣釣臺

戰捷金源遂不能兵

關土宇而靖中邦翊炎圖而隆寶運策勲天府歸美

皇靈方

請命於上蒼思保安於宗社祥開

後聖光啓皇元致今日之隆平蓋

孫謀之燕翼惟天縱其

睿智故

澤流於子孫爰伸疑慕之誠虔舉增

徽之典詢諸輿議允協至公謹遣某官某奉玉冊玉

寶加上

尊謚曰

仁聖景襄皇帝廟號睿宗適守

先猷仰

聖靈之如在式垂

歆鑒降福祉以無疆

追謚

先太子冊文

皇帝若曰於戲故

皇太子某天姿玉裕茂德淵冲

朕紹纂丕圖仰遵

太祖聖武皇帝遺訓以爾世嫡元孫譽望攸屬爰從  
燕邸正位春宮愈貴能謙居貞益慎及夫聽政揆叙  
有方至於睦親昆仲無間尊師問道日御經筵視膳  
候安時詢內豎佐予柔理惠彼小民方念神器匪輕  
投艱有託豈期

前星掄耀未隔幽明日居月諸懷思曷已此者大臣  
敷奏宜易名奉祀光崇彝典今遣某官持冊賜爾謚  
曰

明孝太子永昭遺懿式慰  
朕懷尚冀明靈歆承寵渥

皇太后玉冊文

維至元二十一年歲次甲午五月朔某日嗣皇帝臣

緝謹稽首再拜言洽萬國者莫隆於孝治揚懿德者  
必著其徽稱洪惟我幼冲人嗣無疆大歷服率先風  
化無尚於斯恭惟

太母聖善懿恭睿識遠慮力行善事陰賜及民隆孝  
敬於

先朝軫憂勤於內助宮壺仰其規範宗族化其肅雅  
誕眇躬而底于有成翊燕謀而俾登大寶

深恩至德蕩焉難名匪極鴻推尊曷伸至願載惟

昭考已升祔於宗統言念

宸闈宜大崇其典禮庶幾均報仰答

恩慈今遣某官謹奉玉冊寶上

尊號曰

皇太后伏惟

皇太后殿下端處福宮誕膺顯冊儀

毋儀於四海德配坤元期

聖壽於萬年祥開神筮永資

慈訓保我子孫臣誠歡誠抃稽首拜謹言

改元詔

朕祗適

先猷

嗣承丕構訪予落止在夙夜以靡違永言孝

思閱歲時而憎愴惟春秋之謹始實古今之成規適

屆履端幸新紀號可改至元三十二年為元貞元年

咨爾有衆體予至懷

手詔侍郎揚大淵

省表具之朕恪守玉封遽膺推戴即位之始不遑康

寧惟爾遠戍邊陲久服戎身外心內來陳賀章宜

加寵答之辭以勵忠貞之節故茲詔示想宜知悉

詔罷東平路管民總管兼行軍萬戶嚴忠

濟

爾父承

國家興運左右將士同心戮力封植東平

屹為名藩我

祖宗嘉爾父之功乃建為侯自爾嗣位又二十年

朕初即政命復襲爵往即乃封劄之慎之其脩德砥

行自立名節勉圖後効無忝先猷十七日戊寅巳刻

上臨軒親諭諸路總尹遂以前東平總管嚴忠濟弟

忠範為東平總管仍戒之曰兄弟天倫事至於此

朕甚憫焉今予命爾王茲東土非以訟受之也彼所  
責匪輕故哉今而後苟不克荷非若汝兄幸而免也  
授賀某宣諭大理國制

幼懷竒節筮仕昌時及知過於  
先朝遂撫綏于大理揚威絕域昔收定遠之功服事  
彤庭屢抗伏波之請宜旌前効俾煥綸章汝其宣暢  
皇猷洋溢方外爰體綏懷之意以安遐邇之情轉為  
招徠式副所托

宣諭大理及合刺章俾還本土手詔

嘉汝等來自雲南導從選鋒轉戰千里直波那渚以  
逕於此勤已至矣今若俾爾各還本土以遂厥性優  
賜各有所差

姜百六人手詔

神以知來智亦 藏往言念長江之邁未嘗一日而忘  
遐想仙標載勤駟傳雍容大厦論用復於細氈寂寞  
嚴扃雲暫辭於故隱春寒遣書指不多及

追封皇國舅按赤那演濟寧王謚忠武制

制曰疏恩異姓無踰王爵之崇追冊元勳况在世姻  
之懿典禮所逮存亡靡殊故皇國舅按赤那演天挺  
英姿志宣忠力當

祖宗造基之始為股肱佐命之臣衍慶軒星儼輝

宸極惟勛闕之茂著冠戚里以獨高朕紹述丕圖養

懷世德宜錫大邦之號仍褒宣惠之文可進封濟寧

王謚曰忠武於戲議協明廷庸布

絲綸之命澤流後裔永昭泉壤之光尚想英靈歆此  
龍澤

皇舅濟寧王妃制

制曰爵以德崇既建真王之號婦因夫貴俾隆藩國  
之儀眷我外家德昭

祖母誕彌

聖后作配

先皇豈惟內助之多光溢徽音之媿是宜管形擘燁  
象服委蛇顧予冲人獲紹前烈禮崇報本心焉敢忘  
可追封濟寧王妃與對邦休服茲寵數重衍姻親之  
懿永膺伉儷之榮泉壤雖幽歆承罔昧

贈謚故光祿大夫左丞相都元帥阿木制

制曰功德兼隆其所及者既遠存亡靡間故為報也  
必豐廼眷元勳豈同常品故光祿大夫中書左丞相  
都元帥阿木挺英將種作世虎臣爪牙兼信布之材  
韜畧合孫吳之法惟重厚克膺其委寄故謙恭不有  
其智能當

世祖之恢圖自元戎而宣力奠我南服隱若長城秉  
持旄鉞者三十餘年出入行陳者百五十戰奮身不  
顧忠如皎日之明愾敵無前勢若迅雷之擊載揚我  
武飛渡長江佐收一統之功名出諸將之右繼將明  
命遠震邊庭威方暢於

皇靈訃遽聞於瀚海朕奉

先猷而祗懼念王業之艱難鬱爾風雲追惟往昔優

加卹典開勸後人官資超極品之榮封爵建大國之  
號於戲麟臺畫像豈惟宛轉於丹青甲第賜書庸示  
昭光於窀穸可特贈開府儀同三司太尉并國公諡  
曰武宣精爽如在不昧欽承

太尉并國公夫人某氏制

平章政事卜鄰吉帶母別遠真氏父爲於運宗臣嘗  
有功於社稷夫亦折衝名將屢宣力於封疆位陟中  
台慶鍾賢嗣惟是數者萃於一身其存歿則俱榮蓋  
始終之鮮儻况內德常儀之著而婦規母訓之崇錫  
之以翟芻之章貴之以銀黃之飾沛殊恩於既往示  
深勸於將來在邦彛皆所當然於世教其或有補於  
戲脂田筆啓獨垂範於兩宗蘋饋相承尚流芳於百

祀可贈并國太夫人

追謚司徒鞏公制

制曰節惠易名恩禮備飾終之典依光毓德風雲非  
一日之期故具官某稟性淑均處心貞亮眷  
昭考當歧嶷之際侍內庭多傳翼之功奉事

兩宮勤勞有日爰念卹潛之宿望特班邦教之殊階  
謀參密近而屢効忠誠位極崇高而愈形謙謹朕方  
外于大寶將圖任于舊人已聞歌露之悲可後蓋棺  
之議鼎湖未遠想陪

仙馭之游泉壤生光洞賁綸章之寵可贈金紫光祿  
大夫謚曰忠懿有來精爽不昧欽承

追謚贊平章制



制曰人臣整奉上之忠恩卹奚分於今昔國家有節  
終之典光揚亦賴於子孫於惟闕闕之家况復風雲  
之契某官某儀刑西域柱石中朝以文武之長材蘊  
經綸之大業爰從潛邸早識

英資而又圖回每沃於淵衷度量獨高於天下四川  
分陝

朝廷無西顧之憂六詔行臺 郡縣奠南服之理福

星霖雨動應時祥和氣嘉聲撫綏殊俗念匪躬而盡  
瘁每當饋以興哀朕祇奉

先猷循思遠節位兼將相德全始終况爾孫支光繩  
家訓弼弔孝治進貳文昌用推錫類之恩寵以上公  
之號於戲鑄金圖像豈惟專媿於前賢告第頒書

奠傳芳於來世可贈某官某謚英爽不昧其克欽承

寶平章國夫人誥

國治固先於家齊古今匪易婦挾諒從於夫貴典禮  
攸宜某官夫人某氏婉自名家嬪我賢輔循法度而  
供壺職以恭儉而相夫勞委佗儼象服之尊恭懿融  
管彤之美以正以順如山如河主饋宜家綿休積慶  
夫延登於鼎胙孫進貳於文昌不以輝緝昌彰內助  
仍易小君之號榮借品極之封於戲德容尚肅於舊  
儀詒鸞有煥脂澤於故壠世祚彌昌可封某國太  
夫人謚某號主者施行

追謚故都運梁公通憲先生制

制曰望壚思賢巨子無古今之間顯親盡孝國家有

推獎之崇矧茲文憲之傳薦我世臣之舊資德大夫  
中書左丞梁暗都刺故曾祖金中奉大夫司農少卿  
陟早登科第躋歷仕途履正奉公才優國計持難抗  
節身爲大閑在先儒耆德之間有泰和能臣之譽經  
綸事往道義日尊流澤遠及於子孫致位有開於卿  
相克宣忠力勵相我家不有卹章曷勸來者可賜謚  
曰通憲先生於戲老成雖遠典刑猶見於國人寵數  
惟新潛德載光於泉壤尚期英爽不昧歆承

太子少傅竇公制

傳經明道旣輔立太平之基崇德報功焉可後非常之  
典故擬傳致臨雍之敬而甘盤動憶舊之思古今雖  
殊典秩不異故翰林侍講學士竇默業尊周孔學

天人詢治體以綱常為言論人臣以功利為末侍謀  
帝幄剴切多文貞之風論相中書慷慨見陽城之烈  
而又三代建國明倫是先惟西池徽籥羽之儀故東  
序擴人文之化風移俗易一變虛文地闢天開載明  
正學迺眷兩朝之耆德是為  
先禰之官師稽考規模憂寐風采是用榮分三事光  
融邦教之階恩貴九泉瀟灑玉堂之契有來精爽服  
我寵靈

夫人賈氏誥辭

天人之際若弗可知禎祥之來各以類應允祖宗父  
母尊榮壽考未有不以善而致者具官某夫人某氏  
婉從清望嬪我儒宗恭儉以相其夫勤恪以成其子

珩璜中節藻蕙多儀清白傳家管彤有煇宜爾從夫  
之貴寵膺華郡之封寫詰副加服我休命

追謚賈博兒赤制

負昇于時既逢其

明主當饋起嘆有懷於昔賢其官藩邸近臣

中朝耆德適際風雲之會素多監掌之功割烹調和

迺其常事成儀進退由盡恒規允侍

殿庭望高德度方舊人而圖任遽薤露以興哀歲月

雖深德容如在抱茂陵之弓劍婉孌何窮悵華屋之

几筵未昭

勅奠近因廷奏大需

息章可加贈某官謚曰某嗚呼授寵數以如生幽明

罔間顧諸孫之衍慶福祉方來慰我老成含嘔泉壤

追謚忽林赤制

揚徽內職固有籍於世臣追錫親榮迺式遵於彝典

其官高閑集慶義行視身早以謙柔光聯侍從藝則

名而威則棟責於已而功於人出入禁闈者幾三十

年主典玉食者何百餘事忠勤奉上夙宵在公每多燕饗之儀何止割烹之技方

廷章之宣美遽朝露以溘先可贈某官某謚嗚呼祇

奉仙遊悵同翻於儼景流光泉壤尚垂慶於後人魂

而有靈歆我寵數

進呈

世祖皇帝實錄表

臣某等言臣聞典謨述堯舜之功合名顯著方策布  
文武之政義問宣昭粵自漢隋及夫唐宋咸有信史  
以貽後來况大業豐功震今耀古惟深喜述首議至  
揚臣等誠惶誠懼頓首頓首洪惟  
世祖皇帝仁孝英明  
睿謀果斷爰從

潛邸有志斯民植根幹而佐理皇綱聘耆德而講明  
治道始平大理再駕長江過化存神有征無戰迨其  
龍飛涿水鼎定上都草創政以惟新擴同仁而一視  
規模宏遠朝野清明內則肇建

宗祧創設臺省修舉政令登崇俊良外則整治師徒  
申嚴邊將布揚威德柔服蠻羗加以

聖無不通明靡不燭守之以勤儉朴素養之以慈惠  
雍和攬權網綜覈名實賞罰公而不濫號令出以  
惟行萬彙連茹群雄入敷削平下土統正中邦慕義  
嚮風聲教矣朔南之暨梯山航海職貢無遐邇之殊  
方且開學校而劭農桑考制度而興禮樂

國號體乾坤之統書畫煥奎壁之文聲所有而醜戰  
功不待計而救民乏聽言擇善明德綏刑欽福錫民  
遇災知懼得洪範惟皇之理過周宣條政之勤以致  
時和歲豐民安吏職蓋

帝德克周于廣運故至公均被以無方可謂文致太  
平武定亂略繼

一祖四宗之志兼三皇五帝之功開天建極者三十

五年立經陳紀者二萬餘事以  
謙讓弗違於備紀故纂修未至於成書欽遇  
皇帝陛下夤紹詒謀厲精

圖治亟鑒觀於成憲思通駿於

先聲深

詔下臣俾爲實錄宅心

宗祐凝孝美牆開館局而增置官僚

敕群司而大細圖籍編摩既富搜訪加詳採摭於時

政之編參取於起居之注張皇初藁增未見於罕聞

承奉

綸音俾蠲繁而就簡俯殫管見仰體

宸衷盡略虛文一存實事其饗會征伐文物典章繁

焉列三代之英蔚爾開萬世之業與夫才德孝廉之  
士忠良姦佞之臣版圖主齒之夥繁財賦畜牧之富  
盛謹依條據粗致無遺今具所修成

世祖聖德神功文武皇帝實錄二百一十卷事目五  
十四卷

聖訓六卷凡二百七十卷謹繕寫爲二百七十秩用  
黃綾夾復封全隨表上

進

宸衷臣某等忝備台司幸膺盛典顧惟載筆才何有  
於三長勉進蕪辭慮庶幾於一得冒瀆

聖聰不勝兢惕臣等無任瞻

天望

聖激切屏營之至謹奉表陳

進以

聞臣等誠惶誠懼頓首頓首謹言

元貞元年六月

日閣下儀同中書省丞相監修國史臣等謹

聖壽節賀表 恆 訖 附 四年丁丑代

伏以

龍德御天協千載休明之運星虹流渚開九秋震夙之祥正朔所頒臣民胥慶欽惟

陛下長策遠御叡斷有臨允經制於宏規思光昭於先業修振古未修之典集

累朝未集之勳獨運神機載揚我武削平六詔無好大喜功之心混一三吳見伐罪弔民之舉治道已隆

於貞觀風聲仍邁於漢家尚深闕政之虞屢致近衡

之問詢謀元老懷保小民體群臣敬其所尊免包徭以之固本而又禁酒酤而重民食憫兵餘而肆

赦恩動順輿情咸躋壽域繁爾至元之盛德優於行葦之深仁屬節屆於誕彌適躬臨於巡省臣某等久

承鈞軸列侍瑤墀一作分司 肅省愧無金鑑之封章

切効露囊之微悃鳳來儀而陪舞聽簫韶九奏之音

虎拜手而揚

休祝

天子萬年之壽

甲午賀正表代中省作

伏以寅宮建斗洪鈞轉一氣之春

漢殿稱觴大禮重三朝之慶衣冠環拱文物昭融惟  
皇帝陛下乾健萃精睿思作聖頓皇綱而開大統備  
百度而冠前王澤既洽於域中威復加於海外  
中天而立躋世於平以富藏民惠免逋懸之賦先春  
肆赦

恩深寬大之書繫至治之惟馨致  
上天之伸祐

端臨正旦光動多儀受圖籍而膺貢珍醮臣工而湛  
春酒臣某等率先列辟拜舞揚休政與時新萬有遂  
生成之樂

壽從天格八秩開億兆之祥

大都城隍廟設醮保佑青詞

伏以天監雖高曾易顯思之命基圖寅紹敢忘奉若  
之誠爰自君臨頗歷年所顧眇躬之上託致至理之  
維艱豈期外侮潛消復荷天休茲不炎風朔雪大開  
一統金穰玉燭屢致豐年而又雲靜祁連春回沙漠  
晝日有平安之報霜風無偃薄之虞匪涼德之能然  
皆

聖靈之所佑迺即青陽之月恭修金籙之科誥演琅  
函真臨玉境導含景蒼精之駕覆垂雲洪蔭之仁鑒  
茲報謝之虔重以保持之福干戈止息永惟四海之  
清邦國榮懷亦尚一人之慶如式

至元三十年崇真宮設醮齋意

大元

皇帝紹隆丕構撫御多方欲期中外之安致有憂勤  
之慮爰資道蔭用介福寧擬於今月初三日就大都  
崇真萬壽宮設金籙醮筵二百四十分位消日既良  
預期以告

青詞

伏以纂承有在擴

先業以丕隆撫御收寧皆上天之申佑况年齒之  
向邁資福應以彌深念茲一已之微事有萬幾之  
重邊聲雖捷軫慮良多精力自如過勤或倦而又四  
氣交更而無不順盤多生感受而未免乖和敢殫禱  
謝之誠普冀  
神明之相潛消災滯滋至天休

素履安舒符乾剛而不息皇圖鞏固叢景福以惟新  
無任懇禱之至

祀廟樂章

無射宮之曲 昭成

於赫

皇祖一 睿智聰明天扶

一德海毓群生

文經武暢治定功成禋祀無期昭垂頌聲

無射宮之曲 顯寧

天啓

深仁須世而昌追惟

顯考敢後光揚儀尊謚美禮備音鏘



皇靈鑒止降釐無疆

祝文第一室

於赫

聖武開運立極

啓迪後人奄宅萬域

繼體守文爰及眇質

大位昭升

陰相之力奉薦明禋載祗載式尚祈

顧歆永深

燕翼

第二室

丕顯

睿祖載揚我武左右

禰昆耆定區宇慶衍

本支

紹纂基緒

嗣服惟初禮須告祀

延洪幼冲

永錫繁祉

第三室

明明

我祖神聖無方武定文綏于

先有光運開大統德冠百王

仙馭漸遠攀慕奚極柎廟奉安綰典是式

燕翼如在英靈日赫

第四室

於皇

昭考神靈在天民受陰賜餘二十年不

饗其位眇躬是傳追尊

徽號永言奉先爰用昭告齋慄揭虔尚臯  
申佑寶祚綿延

登明亥元神

維神揔効成功尊臨陰位適承歲德爰誕  
眇躬屬秋仲之佳辰致嚴禋之菲奠仰祈  
昭格永荷

神休

歲星木照星

維神象緯玄穹祥開下土直茲歲事相我  
中人恭伸默禱之虔爰即絳宮之闕庶憑陰佑聿  
底丕平

柳宿照星

維神光臨初度獲纂鴻圖顧惟涼薄之躬萃集  
簡穰之福近因多故致崇幽壇尚冀精英更隆安  
吉

新舡落至祭歲君文

成舟委波謂之落至維神灼知一歲之事况彼中河  
轉致厥載上下安輸非神曷賴

修五門前橋祭歲君地祇文

應門將將前臨天津玉輅所馳虹梁必陳爰構爰  
締築之隕隕神維垂祐迄于有成

五方帝祭文

因方殊號尊以帝稱殿臨五部有赫其靈維橋之作  
鞭石駕梁尚冀擁衛大來百祥

擬禁酒詔

漢賜大酺歲有常數周申文誥飲戒無尋况糜粟者  
莫基於斯崇飲者刑則無赦近緣春早朝議上陳宜  
禁市酤以豐民食朕詳思來奏寔為腴民可自今年  
某月日民間毋得醞造酒醴得天物暴殄重傷時和其  
或違者國有嚴典悔其可追故茲詔示想宜知悉

中書省牒宋三省文

中書省劄該爰自

聖上即位之初重惜南北生靈之故一視同仁首主  
和議故遣信使講信修睦往年征進大軍即令各還  
本屯仍嚴勅邊將非奉  
上命毋得妄動行人街  
命以棘更歲律寂無來音

何哉不惟有失忱辭反啓邊釁以致攻圍我上蔡侵  
軼我鄧鄠龔華陽擾隨州劫掠真陽數犯漣水此皆  
出於使輶已入彼疆之後將和而戰得無異議乎夫  
信與義自古所恃以為國者也一旦棄捐自有任其  
責者矣向也

大駕巡狩北庭以平內難今渠魁授首已於正月廿  
六日還宮飲至頃因行臺入觀

陛見之日具以

奏聞請重兵壓境以問其故五月初五日奉

聖旨此一事發端自我姑待之省府仰體

聖上仁慈尚存兼愛恐拂初心弗允所請且夫

朝廷大計已定此特有司之事耳今就委本路發使

詳問焉若復遲疑不決秋高馬肥至日別有區處當  
司依奉省劄令差諮議官崔明道兵馬副都李合  
義充詳問使移文淮東制司即今國使安在何稽  
留不發并節次侵疆之役具由回示以憑呈省施行  
請早示定議據此須至牒者

順德府大開元寺重建普門塔碑銘

國家以神武戡定區夏際海內外悉主悉臣其所以  
尊顯釋教彌綸元化者方往昔爲最重予以推弘濟  
之深仁歛無量之衆福續大寶錫群生躋六合於仁  
壽極樂之域豈特崇奉而已哉順德府大開元寺  
聖天子潛邸迄於  
御極持護寵錫者前後非一至精藍淨衆特

命近臣主領不與佗寺比三十年間續光起廢集于  
大成主僧崇嚴以寺之大緣寔肇基寶塔今雖雄峙  
雲衛未有紀述何以壽無盡藏之傳至元丁丑秋懇  
華真國師以其事請于

朝制可命奉御脫烈傳

旨翰林院定撰合立碑文者臣謹按提點僧崇湛具  
列事蹟寺舊有塔曰圓照癸酉之兵燹焉逮

國朝辛卯萬安恩公來主函丈始圖興復其感驗靈  
異有神化無方者初公既祝髮心印佛乘機蟠利用  
鍊形辟穀面壁安禪結習於臨城者五年建緣於清  
泉者有日演法出無礙妙辯濟物現當機應身至回  
邪入正卻火返風雞悟靈而啄香牛馴致而受戒寒

泉復皆并之波斗粟周衆僧之供復以慈善根力愈  
奇疾拯危厄人截髮餘珠垂舍利潔庖秦而侍館穀  
代公私而息釋駱其感化方便人巨具舉第以菩薩  
目之以致遠邇隆嚮願言依歸及廟役興得能仁觀  
音舍利二顆光大殊常又易塔心柱礎因風自正故  
勲貴豪富鉅商世農施獻輸給同竟事緣金幣梓材  
不期而輦至藝巧工能不率而子來風動雲委畧無  
虛日不十稔疊構重簷輪奐離立文階層祀勢軋坤  
軸藻拱璇題暈飛塵外若乃紺丸鱗差金輪眩彩覆  
法雲於真境曜慧景於康莊絢爛動滌若金光明中  
現無量化佛仰之者火宅晨涼耶之者重昏夜曉誠  
法界之寶宮河朔之傑觀也實經始於重光單闕之

仲春新季於上章困敦之秋孟筭十有三崇六十仞  
其工與費不可殫紀癸卯冬師拂衣禪室歸寂真空  
即日有雨水冰之異塔位石像亦怛化流潤若潛焉  
出涕者及斂大衆聞空中來妙音樂聲雲光變幻環  
刹成五色樓觀中現三大士像至有升塔投空攀號  
者其具戒門資萬數內嗣祖傳法解三藏教沙門今  
亦千計其為世宗師感慕者蓋如此已酉歲嗣僧崇  
朗因太保劉秉忠奏疏請

聖上為大功德主遂嘉納焉且聞師梵行清修乃遣  
近侍護葬及建塔賜銘謚曰弘慈博化大士

勅寺額曰大開元寺塔曰普門之塔爾後累降

綸恩優護贍卹靡不備至其紹化住持曰崇潤嗣傳

住持曰宗朗崇悟崇瑀至宗嚴九六代初緣清泉淨  
土寺乃大士宗姪崇音住持云臣竊聞大雄氏之教  
以清淨虛寂為心方便慈悲為用愍念大千衆生墮  
落苦海洪濤鼓風漂流無際世尊心運慈航拯溺度  
厄俾登彼岸歸淨土正路又慮一切愛慾有迷悶終  
不覺其本來真心者故假象設教閑死靈歎至理絕  
入區事出天外弗余奚能傳悠久而警悟萬億劫邪  
宰堵波之建假教高顯極矣然道自人弘功繇緣立  
非過間氣傑出智慧開濟大士疇克弘通法海鋪敷  
教基如是光大者哉宜為

聖天子終始崇奉如一特

詔賜詔以昭永世臣某拜手稽首而獻銘曰

釋迦挺生自西域  
經從白馬肆金光  
仁王應世憫言溼  
教因象設濟無邊  
開元大士弘慈公  
法音演出琉璃筒  
高標突地跨蒼穹  
雨華天風韻流鈴  
聖皇錫號曰普門  
要欲手絜閻浮生  
臣聞大德必得壽  
蘿圖鞏固等弥廬

靈山玄風暢無極  
法本誠心歸利益  
大千淪流苦海厄  
塔廟龍宮爭湧出  
五載雷轟奮禪窟  
建此道場化所服  
一日雄尊三百尺  
師雖示寂此長舌  
臣今思議何惻怛  
躋彼仁壽極樂國  
佛應回施無量福

聖子神孫千萬億

秋澗先生大全文集卷第六十七

秋澗先生大全文集卷第六十八

翰林遺藁

擬中書省賀河清表

伏以天開昌運統一車書地應休禎河清陝洛如式  
恭惟

皇帝陛下德昭天漢思溥淵泉覆露何止於中華洋  
溢遠霑於方表以致潤溼九折鏡淨兩涯自陝至紀  
幾千里之遙由乙至丙逮三旬之久鱗介之泳游可  
鑑山林之形影皆分躍圖馬於龍宮未容專美舞  
夷於鱗屋時出効靈顯茲上瑞之方增特表

吾君之至聖臣某等叨居華省幸覩榮光敢傾葵日  
之誠用伐辭人之頌遐荒嚮慕百川宗滄海而玉寶

祚洪延萬壽等舟立之固又國上登下安光益昭萬年之壽

擬聞捷賀表

天網雖疏曾恢恢而有失罪人斯得迓穆穆之來平  
外侮既消頌聲交作臣某等誠歡誠抃頓首頓首恭  
惟皇帝陛下仁含動植德媿生成振長策而用三驅  
念天顯而悼九族符雷之震遠驚而邇懼大風之舉  
歌動而雲揚側聞喜自於日邊豈止威加於海內臣  
某等職叨省署阻奉

鑿輿竚目龍旂遙伸虎拜歸牧武成於周馬歌功美  
邁於唐饒

六轡言還春動兩都之和氣千官欲至歡騰萬歲之

霞觴如式

中書省賀正慶八十表 甲午歲

伏以明堂受籍萬方歸一統之尊神策探祥八秩開  
大椿之首稽諸前古曾未多聞中賀恭惟

皇帝陛下德本至仁天申顯佑維神聖之廣運致功  
業以獨高粲然萃三代之英蔚爾割一家之制與天  
立極躋世於平我澤我威洽乎南而暢乎北曰聲曰  
教漸乎東而被于西方且通達下情蠲除積負肆

赦恩而哀矜庶獄翕泰和而煦育群生宜福壽之既  
如川方增見寅畏之心維日不足端臨元會光動漢  
儀舒化日於中天湛露息於春酒願叨承

睿眷久侍瑤階倍位秉鈞何補馨香之治捧觴上



壽永膺億萬之年如式

中書省賀 尊號

皇帝壽八十表

伏以廣二億而輪二億萬方歸一統之尊

春八千而秋八千

六葉開大椿之首稽之載籍曾未前聞恭惟

憲天述道仁文義武大光孝皇帝陛下

德本至仁天申純佑繼

一祖

四宗之業兼三皇五帝之功

燕 貽謀動從民志以

太孫撫軍而重安國本以新河轉漕而通惠畿民建

大學而首善京師

清中書而杜絕群枉緩回

鑿輅省秋歛而即田功丕顯

前光纂武圖而修信史惟

聖神之廣運納

福壽於方來神蒿屢聽於三呼錢祖莫多於八百顧

茲鉅典稱慶宜先况盛事之難逢幸微生之親見臣

其等職司蘭省喜倍輿情順考百王實光千古輸誠

報上區區歌天保之詩以億祈年永永同洛書之誦

又

伏以王正紀月萬方歸一統之尊神筵儲祥八秩啓

無疆之等况得春於上日協正氣於四時事盛來并

禮須交慶恭惟

尊號。陛下誕膺景命，祗紹炎圖，載績三代之英，創作一王之制，繼天立極，躋世於平化，行鯨海之南，威暢龍庭之北，廓廓然可謂無事，魏魏乎其有成功，方且以富藏民，與免積年之負，方春布德，肆頒成赦之恩，宜壽祉之方隆，見嚴恭之克享，端臨元會，光動皇儀，舒化日於中天，湛露恩於春酒，臣等率先列辟，拜舞稱觴，文侍台階，何益體元之政，願言洛誦，永符書億之年。

聖壽節表

伏以日符協夢，茂隆探策之祥，鳳曆周星，方啓同天之運，休徵滋至，海宇交懽，中謝恭惟。

尊號。陛下聖學日新，聖模天縱，恢章先業，垂裕後昆，所欲從民，爲未立極，以

太孫撫軍而重屬世望，以新河通漕而倍溢民儲，建國辛而首善京師，清中書而杜絕群枉，方

翠鑿之回軫，慶玉燭之調元，敬展賀儀，載臨誕節，臣某等承乏鼎鉉，同秉國鈞，愧無金鑑之書，徒切露囊之獻

光瞻

比極列衆，星環拱之先

壽等南山，仰天保不騫之祝

翰林院聖節賀表

伏以翠鑿回軫，屬千官飲至之秋，玉燭調元，慶萬寶

登平之歲載臨誕節煥舉賀儀中謝恭惟

尊號陛下內極文明外昭桓撥爰從登極之初未嘗以位為樂思章先業垂裕後昆燕貽謀而以之撫軍清中書而俾之端本于以息肩中夏謹度俟蕃上禱下祈為民歛福東征西伐與世除殘文軌一家而不可謂和樂者也尚觀惟新之政攬推不忍之仁包舉遐荒涵濡聖澤臣等叨居辭館榮列士林敬奉倪觴俯仰虎拜敢希金鑑之誠仰罄神嵩之頌感生北帝歌有商長發之祥壽等南山罄天保不騫之祝

謝授翰林學士表

臣言今日蒙

恩除臣翰林學士者伏以求賢圖治遠邁

哲王養老乞言誠為重事况

聖代方文明之盛在禁林須超逸之才如臣者學術素疎桑榆垂晚俾擢升於衆上殆選有於無中茲蓋伏遇

皇帝陛下聖敬日躋文思天縱紹接千年之統光揚列聖之徽舍所短而就所長小成小而大成大敢不疑思螭首益礪詞鋒由外臺而登玉堂固已極當代縉紳之寵約舊章而修信史何敢企高天日月之輝如式

登寶位賀表

伏以承祧主器已欣曆數之歸助順與能允協神人

之望事光前古運洽重熙欽惟

皇帝陛下

皇祖聖武之曾孫

明孝太子之嫡嗣英武同符於

先帝温文早著於春宮扈蹕東征躬勤備至撫軍北  
邁我武維揚符命自至而呈祥宗盟樂推而同戴既  
深丕眷所助宜多觀大寶之昭外將兆民之求賴中  
統至元之治行見增隆漢文夏后之賢莫之獨美光  
融化日歡沸民謳臣某等以事

先朝備位政府再逢嘉會喜邁輿情景命維新按軒  
曆上元之統太平假樂稱瑤階萬壽之觴

老人星致語

伏以太平有象治洽金穰至德無方文綏武暢惟精  
誠之上感致淵曜之輝臨臣遠自孤南光融狼北冠  
眉鶴髮月帔霞冠遽踰常度之躔來展流虹之慶懽  
皇帝陛下王帛萬國庭衢八荒紹

列聖之垂休圖舊人而共政幾先物而聰明齊聖量  
包遠而恩澤無遺取憑出丙之微明用禱後天之遐  
筭咸躋壽域樂對昌辰南極何深下坤維七十五度  
北辰伊邇拱乾位億萬餘年爰捧徽章式伸善頌其  
辭曰

天地穹窿一氣氤祥開來表

帝皇真九圍覆露堯天大萬有榮懷湯德新報上疇  
非思下下推恩及物自親親通明殿裏長生奏願祝

元貞萬萬春

中書左丞姚公制

朕聞

世祖睿臨之久有文王多士之稱如種揆楠而借梁棟之材如積璠璣而供瑚璉之器而况先朝故老當代名臣良用慨然想見風采故中書左丞姚某生稟淑質世稱大儒爰自

潛藩殆若神授天扶道統力士經筵以聖道而覺斯民燭天理而息邪說智足以達其言行辯足以濟其經綸耕桑開王業之艱征伐佐雲南之舉罷侯置守轉官之制初行論道經邦建極之功斯在是用圖回左轄羽翼

春宮永惟佐命之勤式贊

承祧之美齋羽東序從容賢傳之嚴

綸綍北門寂寞玉堂之話百身莫贖一鑑云亡開國於營用旌直德可贈某官某謚俯惟英爽款此寵靈

中書左丞許公制

朕究觀世數灼見天心粵惟有不世出之君然後得大有為之士運符千載道濟一時中書左丞許某爰自師儒遂拜左相用之不惟不重學之不惟不深貞一乃心執持苦節謀謨善斷精識造微旣逢堯舜之明用安社稷為悅君聖臣直理明道尊庶幾夷夏之安風以詩書之教衣冠萬國雍容叔孫之儀仁義一家剴切魏徵之諫在中統至元之治有永淳貞觀之

風此其效焉功可忘耳而復養英材於國學齊士政  
於璿璣白首南歸尚深北顧憂來丘禱歎歎柱石之  
衰人去鑑亡瀟洒風雲之契感時懷德想像其人忍  
惜卹章俾疏身後可贈其官其謚尚期寔安不昧欽  
承

翰林學士承旨王公制

人臣大節忠義為先卹典推恩古今一致故翰林學  
士承旨王某道德淵深人品峻潔板蕩見忠貞之操  
文章有正大之風養力息兵貽謀進諫惟軍國正撫  
監之體時謳歌貞曆數之歸白首匡時赤心為國庸  
示至公之論曾無一己之私而又扶昌運則一代名  
臣鎮雅俗則百年遺老去日漸遠有念何窮九原之  
氣猶坐不忘宗社三事之執斯在庶極哀榮可贈某  
官其謚尚與英靈服我休命  
請上尊號奏草

臣等言伏見

陛下昭受

顯號今已十年

聖德神功日新一日又

聖壽新歲茂登八秩考千典禮合行再上

尊號上以贊揚

功德之萬一下以整臣子愛戴歸美之誠謹此奏

聞伏冀

聖慈特賜允許

表外任進賀

聖壽節賀表 至元三年

電繞中樞寶曆啓千齡之運祥開彌月瑤堦儲八葉之賞九在覆臨疇非鼓舞欽惟

皇帝陛下聰明時又聖敬日躋爰從在御之初未嘗以位爲樂大度同符于漢祖宏規遠邁於唐文纘

四聖之丕圖新一家之大典尊崇故老思致隆平委任勲賢迭居宰輔文之以詩書禮樂律之以軌度儀

刑薄賦輕徃首官定制尚側身而修行每前席以賓賢察納雅言彌綸元化上所以恢章先業下所以弘

濟生民凡曰云爲務從休息分總司而去積年之弊更庶尹而削藩鎮之權尊祖配天安宗祧於九廟敷

文柔遠舞干羽於兩階功德兼隆神人交暢以致服前代所不能服臣上古所不得臣東夷航海以來庭西域梯山而欵附可謂振長轡以遠馭故中國之至仁仰惟極治之難各皆出聖模之廣運載臨盛旦敬舉賀章臣等猥領郡符恩崇天造進乏千秋之金鑑遙稱萬歲之霞觴同虎拜以揚休下列阻陪於北闕効嵩呼而獻祝賡歌載詠於南山

聖壽節賀表 至元四年

甲觀開祥嗣大歷無疆之服華封請祝罄後天難老之期九在壽臨率均呼舞中謝欽惟

皇帝陛下文思天縱聖憲日新得漢唐經國之權綱極堯舜知人之濟哲以岳牧治本也疏之而冊授中

書化源也清之以弼諧尚兼聽以爲明每得賢而恨  
晚溥覃祿秩優復民田有官荷覆露之恩含氣遂生  
成之樂家給人足時無歲豐九歌莫被其神功萬事  
馴歸於道揆而又順長道而屈群醜推至悌而御多  
邦謂本支一出於祖宗重䟽恩而立愛江漢終歸於  
淵海首繼好以息民由旣睦而於變時雍以克肖而  
全付所覆春際八荒之壽域天開一統之徵祥瑞屢  
見於蒼麟箭罷傳於青海西窮月窟率稽顙以來王  
東極扶桑復寅寅而朝日緊爾至元之盛烈於昭曠  
古之深仁瑞節載臨賀儀煥舉臣某等心馳魏闕職  
限侯藩阻振鷺以陪庭儼天威之在上千官飲至傳  
闔置酒於南宮萬歲稱觴第切瞻光於北極

兩宮正位稱賀表

伏以正位建儲舉一代當行之典推仁被化遂萬邦  
咸喜之心凡在臣鄰同音鼓舞中謝恭惟

皇帝陛下道彰坤順德益離明治首

宮闈基隆

國本著

母儀於天下融

少海之波光謳歌見四海之歸教治豈二南之廣壯  
本支於百世聳官儀於一時某等職忝侯藩心馳  
象闕徒切煙花之想阻陪鸞鷲之行敢罄丹衷載陳  
封事德符寶運拜揚稱三殿之觴慶衍蘿圖綿亘接  
萬年之統



聖壽節御史臺賀表

鼎定皇圖接千歲上元之統天開甲觀儲九秋盛德之祥聲教所加謹呼斯溥中謝恭惟

皇帝陛下堯文天縱湯聖日躋爰從在御之初未嘗以位爲樂躬勤儉德夢想幽賢察納雅言恢弘治道蕩皇威於北海藉千畝於東郊載崇列聖之鴻基仍制一家之大典漢官儀之漸復唐治具之畢張尚深闕政之思屢下卹民之詔內被災而修行外發政以施仁明德緩刑輕徭薄稅而又天臨睿智坐折遐衝昭曠度以無前振長轡而遠馭爰整干戈之事終歸雨露之恩雲掃黑山孰謂玉關之久閉春回鴨綠旋聞滄海之維清旣荒外服之功尤盡內修之理緊爾

至元之盛烈於昭曠古之深仁瑞節貴臨賀儀煥舉臣其等榮叨臺諫戀切葵傾陪稱漢殿之觴仰効露囊之獻光瞻北極整封人上願之心壽等南山伸天保不騫之祝

聖壽節賀表

窳員曆日膺期接千歲上元之統日符協慶開九秋盛德之祥稱慶惟均際天所覆中謝恭惟

皇帝陛下離明繼照乾健乘時動順民宜更張治化未懿德而式序爾位任吉士而勵相我家尚深闕政之思屢下子民之詔去網更仁於湯祝敷文思格於苗頑旣荒外服之功尤盡內修之理卜營督亢宅壯陪涼據山河全勝之區得貢賦適中之地干以隆上

都而觀萬國備時巡而禮高年四聰達群下之情一  
豫為諸侯之度臣等榮叨郡寄心切葵傾阻稱漢殿  
之觴徒効露囊之獻運鍾北帝祚有商長發之祥壽  
等南山伸天保不騫之祝

御史臺賀正口表 至元八年為御史時作

伏以鳳曆頒春三正協夏王之統雞人唱曉萬方稱  
漢殿之觴品彙冲融衣冠環拱恭惟  
皇帝陛下容德乃大盛蹟無前載新出震之權端履  
乘乾之位東漸滄海高麗蒙再造之恩西極渠搜葱  
嶺多來庭之使國字創一家之制朝章舉曠代之儀  
方漢之險何足恃乎高深蓬萊之波旋復聞其清淺  
終格羽干之舞姑奉文誥之辭咫尺天威趨承鳳闕

蕩恩光於萬里醉春色於九重臣某等久侍瑤階叨  
居憲府獻可替否詎能振臺閣之風拜手揚休仰以  
祝河山之壽

正旦賀表

伏以玉燭調元葭莩啓堯堦之曆椒花獻頌錦封陪  
漢殿之觴朝野同歡乾坤交泰中謝恭惟

皇帝陛下仁涵動植德備廣淵受籍以朝履端於始  
爰體春王之月屢頒寬大之書顧軫軫慮以洪深躋吾  
民於仁壽而復開明堂而坐治奉帝藉以躬耕摠攬  
皇綱務滋大本鳳城斗轉春迴萬里之農桑紫禁天  
開瑞靄兩都之雲氣臣某等叨承列郡遠被恩光敢  
俯傾葵日之誠仰以効華封之祝遙瞻北闕天威殆

咫尺之臨壽等南山神筴授萬千之筭

史都督讓總管表

臣謹言推賢以位敢希高世之名以讓移風固有爲  
邦之教志雖自信政亦當然中謝伏念臣某等鷹犬  
微材邊防舊帥起家燕地分土恒陽累朝荷眷遇之  
恩報國之忠貞之効正以先臣之故以膺方面之權  
崎嶇提陽夏之師屯戍控荆門之會仰憑

聖筭十載無虞鎮守長江寸功何有比加寵數方驚  
都督於諸軍恭被朝章俾襲天倫之舊物

君命稟雷霆之重微軀處伯仲之間情有難安禮宜  
遜讓臣兄某灼知民事素秉忠功收製錦之能政  
洽承流之體如黃霸已優於治頴何景宗邊可以臨

民伏望

聖慈鑒臣愚智非敢圖私已之便實恐貽不友之譏  
念念天恭敢後周古之誠堂堂大國務先常棣之風  
謹拜表以聞

聖節望闕祝文

龍馬授圖已肇興王之迹流虹啓聖大開彌月之祥  
九居覆載之間疇匪惟忻之至欽惟

皇帝陛下聖謀能斷睿智足臨天祐人歸功崇業廣  
西平大理蘇雲霓倏望之心南渡長江得風日清明  
之助爰履神明之祚恭承祖考之休肅示至恩以昭  
曠度親王昆弟光輝棣萼之樓異姓勳臣揚歷金華  
之省尚求賢而若渴每從諫以如流所期無曠於庶

官急欲廣聞於民獲禮百神而歛福順三時而務農  
載戢干戈俾安四里施仁發政先困窮無告之人講  
好息民傳邊鄙喜功之奏而又兵民異政威愛並行  
鑑古昔之安危立規模於宏遠移官吏而除累年之  
弊崇儒雅而興文治之風尊京師而強翰弱枝削藩  
方而如臂使指分宰相於諸道專委任而責成功置  
統軍於遐陬蓄精銳而消外侮唐世之時雍丕變漢  
家之治具畢張以致祥風扇和時兩霈德炎洗蠻邦  
之瘴春回沙漠之寒車書八方不日治平者也煙火  
萬里可謂和樂者乎民歌德化之成心靡帝功之有  
當萬寶秋成之節適群龍首出之辰湛珠露於仙盤  
蕩金風於玉宇香檮三山之紫霧權騰大液之蒼波

吉日光臨溥天同慶臣等叨居民部阻奉壽觴不勝  
葵藿之誠仰答乾坤之造遙瞻北闕天威逮咫尺之  
臨拜祝南山神筴授萬千之筭

十六年賀正旦表

任河南河北道撰刑時作

玉燭調元允協三朝之始春城回斗茂凝一氣之新  
正朔所頒邇遐交慶欽惟

皇帝陛下端臨左介誕受輿圖仁播春寬道開時泰  
化日舒而民力足奔鯨沛而海道空清明際區宇之  
間鼓舞樂雍熙之治尚惟事統丕顯聖謀孜孜下達  
於民情念念化隆於邦憲保釐荒服咸吏冗而益監  
司惻憫長征數軍實而免貧後功極見寢兵之漸策  
長畫馭遠之方履茲肆覲之辰介以如山之社臣等

欣逢盛旦叨領外臺政罔肅於簡花禱徒伸於椒頌  
遙瞻宸極阻奉觥觥夢聽鈞天霑露恩於春酒對揚  
休命祝

聖壽於南山

聖壽節賀表 至元十七年八月初二作

秋滿皇都荷

大駕省方之豫祥歌長發屬千齡應運之辰夙旦載  
逢儀章煥舉恭惟

皇帝陛下聖惟桓撥智足睿臨昇式九圍大開一統  
爰念盈成之戒每深覆壽之仁挈彼生民躋于壽域  
兵刑寢措收  
帝王之極功基業恢弘光

祖宗之不緒儲此無量之福有來滋至之休際爾大  
元於斯爲盛臣等叨持使節遠達天威雖微金鑑之  
翰誠敢後封人之願祝盤銘至再天心享一德之新  
嵩呼者三

聖壽永萬年之筭

進瑞芝表

皇帝聖旨裏臣某等言於所領汲縣界內今月某日  
陶工朱良舍中產土芝一大本者伏以至和大來嘉  
貺昭應爰念開先之兆聿彰承順之祥臣等誠惶誠  
恐頓首頓首欽惟

皇帝陛下政治慈仁敬事者舊

聖惟廣運惠澤春融

德合無疆瑞草英發彤枝曄曄合爲連葉之芳紫蓋  
煌煌復出銅池之秀木擗漸稱於弘景郊歌美並於  
班書以茲玉質之竒特著

吾皇之壽適迎

誕節恭覩殊姿臣某等無任忻抃慶頌之至謹具表  
進獻以

聞臣某等謹言

甲申歲正旦賀表 山東憲司

伏以齊七政于璣衡統允協於夏正受四海之圖籍  
喜大溢於周邦香翻白獸之尊光動黃麾之仗恭惟  
皇帝陛下睿臨神筭武定文綏體元建極於中天顯  
任責成於諸相惟德應上天之眷遂運開一統之祥

宴錫彤弓畫接玉闕之使塵清滄海暖回揚谷之春  
歷觀往代之規模未見今日之全盛尚軫憂勤之念  
屢頒寬大之書便民之政以次舉行煩民之事悉令  
革去廓廓然可謂無事巍巍乎其有成功臣某等幸  
際鳩辰敢陳椒頌遙下肅雍之拜如臨咫尺之威紫  
禁紫花夢想鈞天之奏華封獻壽祝同嵩岳之呼

聖節表

伏以氣調玉燭開九秋大有之祥露湛霞觴獻  
天子萬年之壽賀儀煥舉海寓同懽中謝恭惟  
憲天述道仁文義武大先孝皇帝陛下立賢無方從  
諫弗弗畏服得所臨之道威揚極載績之功平內難  
而以義威親停遐征而敷文柔遠而又政歸一相事

革多門永言夙夜之思大得股肱之助臣某等忝膺  
郡寄密邇

天顏歌天保以歸休阻陪駕列整華封而願祝竊効  
嵩呼

戔

千秋節賀表 至元十八年六月

暹炎烏火見上天於穆之休一作皇天眷命大開

誕勝之月

帝降玄商適長發其祥之月千秋稱慶四海攸同欽

皇太子殿下德粹元良道隆純考允當楚璧歷試堯

難未明問寢於龍樓思治均望賢於漢苑日深子愛時

御經筵擴推不忍之仁陰作無量之賜而又維持臺

憲與振朝綱左右端人圖惟國政雖一事仰資於

聖斷致兩宮咸得其懽心以茲中外之情願切撫監

之望某等內塵法從外領雄藩恩深少海之波瀾躬

侍春坊之劍履玉卮為壽陪鳳舞於西池鶴禁揚休

等嵩呼於北闕一作玉卮獻酒陪鳳舞於西池室

啓

上經略史公啓

壬子年三月十七日門下王某謹齋沐頓首百拜致

啓于

經略相公閣下右某言乾坤草昧建諸侯所以濟屯

茅土分封惟太人為能開國仰佐

龍飛之運須資攝降之賢擬議以言非公孰可洪惟

經略相公閣下器兼文武運偶經綸衆推爲上將之材自任以天下之重攀鱗附鳳早依日月之光捧轂推輪榮受干戈之命萃一門之忠孝兼五路之侯封終始四朝陰夷一節仁溫溫乎冬日氣凜凜乎秋霜內蘊一誠外含萬動推而行陣則勇摧大敵歛而康濟則澤被生民顧所遇之如何必其才之相應鷹揚虎視收中原百戰之勲蘭婉芝芬靄漢將千金之譽旣備過人之智故多及物之功緩斯來動斯和存者神過者化紅蓮綠水盡借壽入幕之賓長劔危冠皆扛鼎蒙輪之士謂蟻穴尚干於天討詔龍驤暫駐於遐陬旌旗未指於淮壩草水先聲於江左虛懷下士宜平原賓客之三千不戰屈人切充國便宜之十二

雖閑暇不忘於武備一周旋悉本乎儒風詩書鞍馬之間談笑風塵之外又且脫屣示讓在人所難當諸郎勝事之初乃一旦奉身而避弃壁而負其子林回雖近於人情捨已而與諸人季札蓋存乎教與方慶懸車之樂復承顧命之榮乘騏駟而超天河以腹心而參廟筭增輝白日叶贊明時力障群陰春回華夏試手已安於漢鼎阜民共拂於薰絃柱石之力初不讓於霍嫫姚股肱之貞豈復減於蕭相國而又量容江海利先國家顧所收之邑奕以不爭蓋先見之明知其有在果展斗間之紫氣卒收度外之鴻名知其褒有成忠存膺渥春復衛邑爲之湯沐豈曰偶然錫康侯至於庶番固所宜也望符輿議歡動百城顧茲



繼負以借來寔出恩威之素着僉曰維昔有虎苛之  
政于今無犬吠之虞一新焉織之風共沐神明之化  
出幽谷而遷喬木孰不快哉若大旱之望雲霓後斯  
父矣此共推於公議匪獨出於私心今衛勢據上流  
土名沃壤衣冠之所出風化之所生柰何民陷死者  
積年政弊極之有日治期清靜無如宰牧之良俗久  
浮佻宜審急先之務况仁深改革意切矜憐固非賤  
子之當陳諒以愚衷之所激伏念某三尺微命一介  
書生慚非適用之才素負讀書之念無繩以繫白日  
昔年甘落佩之迂披霧而覩青天今日有彈冠之慶  
且平昔想聞其風采况終身得為之主盟為喜可勝  
所憂一寫聞風興起已空北海之濱杖策來歸獨塊  
尊嚴不勝戰栗之至

上姚敬齋啓

中統元年七月六日席生王某謹齋沐頓首再拜致  
啓于

尚書宣撫先生閣下伏審

九天頒詔側聞方岳之分臨四海嚮風喜見太平之  
有自顧惟孱劣曷稱提斯况

朝廷方弘治之辰而州縣以得賢爲急須獲玄德外  
聞之士可副大人吐握之懷如其者稟性踈愚與人  
朴直斷无它技徒切休心爰自擇年特乖庭訓雖讀  
書鄉曲謾攻童子之雕虫及學道蘇門徒竊孫登之  
吟嘯因沾餘溢得列諸生然固窮不輟於絃歌念求  
事可爲者忠孝吾將仕矣未見其人蓋女爲悅已者  
容士爲知己者死俄翰簡光臨於圭竇見先生樂育  
之素心爲喜可勝所憂一寫何乃至於此蓋有激而  
去身賤貧而處世無聞跡泥塗而遇知爲貴若夫燕  
築臺而師郭隗豈天下之無人備奉命而奔孔融所  
喜世間之有己將搢衣於不日終歷膾以謝誠伏惟  
閭下學際天人材兼文武幾年潛邸一變經筵儀表

四方股肱元聖方基聞捷偉謝安雅量之雍容抗表  
出師見葛亮忠規之遠大以致佐命收奇功於六詔  
除殘債封豕於三秦盪平青海之波濤補就蒼天之  
日月方聳馬空於冀北首令詔撫於山東杖扶戴白  
之疲瘡春動百城之草木欲隆承流宣化之權故擴  
并採兼收之路慮一夫之不獲念小子以何堪戴德  
若天疇恩無地比遂掃門之役庶堅磨鈍之誠利一  
割之鈿刀享千金於弊帚翮知短鍛敢圖運海之鵬  
程言至再三恐辱知人之藻鑑過此以往未知所裁

上張左丞啓

中統元年六月日衛人王其謹齋沐頓首再拜啓事  
於中書左丞宣撫相公閣下欽聞

明詔來鎮雄藩凡在提封咸增慶抃謂天下大統也尚建侯而不寧初無中外之限方岳至重也惟得賢而俾乂故咨惟幄之臣然念德非盛大不足以填墜夸毗量非弘深不足以包摠細大才非經綸不足以酬事變望非崇高不足以厭饜人心恭惟閣下德富天彝材爲世用望出中朝之勲舊量涵萬頃之汪洋兵濟長江符羊祐抗章之志龍興代邸倬宋昌獨斷之能故得雨闢雲開陰消陽長雷霆驅號令之威朝野擴網維之治繡衣南下宴承流宣化之權齊斧西臨正適伏破姦之日而今况河朔數路懷衛兩州世官有悅唐擅據之強風俗近天寶塗炭之苦穢彰隣邑政出多門其爲害也權在吏胥之手賄甘桀黠之心

敗者能先去之善人者其自存耳以  
聖求直言之者故愚儒及舊政之非伏念某一介布衣半生文史顧其時之可出念所學之無成此闕上書媿乏馬周之志南山種豆每懷楊惲之風觀化明時游心至道不求鳴於時相終混跡於常流少得見知侯喜顯名於韓狀如蒙所讀曾點終老於孔門過此以還未知所措

授翰林修撰同知制誥兼克國史院編修  
官謝中書省啓

中統二年秋七月廿九日王某謹齋沐頓首百拜奉啓事于中書門下伏以幼學壯行自吾儒之常事位尊德薄寔君子之深憂况禁林乃清切之資而自昔

極人文之選如某者性資撲魯學術蕪蕪幼窺篆刻  
之文稍服鯉庭之訓而葺修葺有其素徒佔畢不去  
其心血指汗顏竊弄柳州斤斧屬辭比事略窺左氏  
門墻賴鸚薦之先容致囊錐之立見幸遇鴻熙之世  
未觀上國之光自嗟坎井之蛙日侍幕蓮之地時乏  
駿足用駑馬以代駿筆悞素屏點蒼蠅而成質方退  
南飛之鵠重留西掖之垣方進預使席之榮行李致  
館人之意念朱雲之恥吏哀王孫而進殮顧影自怜  
捫心有託特以見知之厚遇不無立仗之長鳴苟丐  
虛名盡光歸路豈意誕膺綸命峻陟文階忝分蓮炬  
之光得與玉堂之選固不能奮陽城之觀望無乃自  
郭隗而權輿儘不負十載夜牕燈火之勤足以照九

原先子之目其榮已極夫復何求茲蓋伏遇中書相  
公閣下柱石中朝風雲替邸羽翼四人之勲業文章  
兩漢之精華秩乃代天門無弃物父子傳溫國之學  
書史備鄴侯之籤公埒權衡彼自爲之高下信如寒  
暑卒皆遂於生成豈謂幘幘蔭及蕭艾其敢不勉修  
士行恪守官箴仰酬雨露之恩俯答丘山之德遼遼  
運海固敢期九萬里之程碌碌因人衆不在十九人  
之後過此以往不知所裁謹奉啟事以聞王其頓首  
再拜

青詞

齋意

旱氣隆蟲歷三時而已遠守臣惶懼顧大責之難逃

輒先穀雨之辰敢罄雲求之懇預期以告於禮則宜

祈雨青詞

恐懼自修災有可消之理敬誠斯在天無不饗之心  
伏念臣憚素昧臨民叨承物寄每荷登穰之惠庶寬  
撫字之憂爰自去秋迄于今歲風霾蓬勃生意焦枯  
時疫大興秋種未下氣將交而寒薄雲已合而風醜  
既走郡祠載呼洪造恭輸至懇光啓靈壇集道侶於  
琳宮宣琅函之真誥伏望九天降監列聖垂慈分勅  
山川之神普下雷霆之詔風災一返膏潤咸霑便春  
事無訛喜動四郊之耒秋成有望歌賡高廩之詩臣  
無任瞻天望聖激切屏營之至

祈雨青詞

伏以萬物盈於兩間亭毒必資於帝力自皇天祐于一  
德高明庶格於精誠比者時雨愆常秋種不下重念  
無辜之者將罹飢饉之災用是罷將作而弛土木禁  
市酤而重餼糧循省自修冀回哀眷氣將交而寒薄  
雲旣密而風醜適當龍見而雲爰致桑林之禱恭述  
真馭崇建靈壇伏望列聖垂仁九天降監易陰陽之  
恒數幹運化之玄機下勅豐隆霈流甘澍蘇槁麥於  
南畝播嘉穀於東郊一滌昏霾溥含生意豈惟大賚  
三農免失業之憂嘉與多方高廩享有年之慶

祈雨青詞

天地乃萬物父母忍飢饉之荐臻風雨爲一歲咎休  
顧得失而與應念守臣之不職致春旱以爲災終風

且雲霾種不入土近雖霑其濡潤終未至於雲霧二麥  
就枯群情懷懼念禱寡無辜之者有溝壑立至之憂  
既走郡祠載籲玄造瀝愚衷之至懇建雨部之靈場  
伏望真宰鑒臨高穹陰陽溥同一視之仁大霈如膏  
之澤興嘉苗於四野際和氣於兩間庶寬轉側之勞  
共慰後蘇之望所有報禮其敢後而

為春旱重災青詞

伏念天聽雖高惟至誠而能感田功未即驟歲事之  
可憂敢瀝丹衷仰干玄造茲者自春徂夏時雨愆期  
美黍卷而步屈為災嘉禾槁而風埃蔽野吏則不德  
民將何尤非恐懼以自修將蘊隆而曷已爰差穀旦  
乃建靈壇延致羽流恭修法供應蒼精之昏見異誠  
意之孚通伏願列聖垂慈九天降鑒俯回哀眷霈甘  
澤於一方丕顯神功享豐年於高廩

齋意

伏以驕陽恒若時雨未沾嘉禾槁而耕墾如焚步屈  
災而春蚕闕食齋心預告於禮攸宜

為張縣尹吉求嗣青詞

伏以不孝有三身無後而為大輸誠儻至天雖高而  
聽卑敢瀝丹衷用干玄造伏念臣某一行作吏壯歲  
當官久居簿領之間未免輕重之懼或養志罔終於  
侍怙或臨民多靳於哀矜以致二子併亡半生惴獨  
自孽難逃於陰譴隱憂忍及於先人敢資惟惠之仁  
爰謹籲天之請敬陳清醮上扣高真伏望大眷垂哀

憫孤影零丁之苦維羅應夢廣一門嗣續之傳

為鄉人禱疾青詞

伏以民固多愚匪易天心之感老惟欲逸何堪豎疾  
之嬰敢以聽卑用伸懇至伏念臣某生居市閭長失  
義方凡有作為不無過咎或營營以窺利或昧昧以  
馮生正以貪癡愈深罪釁又緣移徙多所紛更穿掘  
既發其蓋蔽修治悞衝其禁忌以致災徵未已病日  
彌留和豫既乖眠食稍廢採藥徒為之眩眩朝昏遂  
苦於呻吟伏望上聖垂慈高真降祐庶憑仁覆得蒙  
羸劣之安言念愚衷未謹省修之戒

秋澗先生大全文集卷第六十八

